

**Mbete kí njèkungì mutə kí  
Ja  
ndàngì  
Ta-je kí do Mbete-tì kí  
njèkungì mutə kí Ja ndàngì**

Njèkɔwkułə Ja ndàngì mbete kin kdo kulə-né dingəm mee dingəm-tì kí ri-é lə Gayusi. Mbete kinlé, ɛ ya to mbete kí goji itə mbete-je lay kí mee Mbete-tì lə Lubə. Mee mbete-tì kí nè Kinlé Ja pa ta kí sobi do ta kí togro-tì kè ndignə titi kí ɛ pa-né mee mbete-je-tì kí joo lé to. Mee mbete-tì kí nè kinlé Ja pa ta ɔsi-né kagi do njéndó dow-je né-je-tì kí ngom al, ngà ɛ pa ta ɔsi-né kagi do dow-tì kí panjiyə maji al. Lo tum gin ndàngì mbete-tì lé, njèndàngì-é toji rɔ-é kí «'ngatógi.» Dow kí káre kin ya ndàngì mbete Poyta kí Maji kí ri Ja tò do-tì bá ɛ ndàngì mbete lə Ja kí 1, 2, 3 rəm, ndàngì mbete Né-je kí 'teɟ do-é ('Ndó ta-je kí do mbete-tì kí doɔy kí Ja ndàngì). Ja tum gin toji rənəl liə kdo Gayusi kí isi mee néra-tì kí togro-tì. ɛ pa ta do ndigi-tì kí tò mee Gayusi-tì kí ɛ toji loki uwə-né mba-je kí njékɔw kilə mbe Poyta kí Maji lə Kristi kí rɔ-é-tì. Ngà Diotrepi, dingəm káre kí dan njékəwnə-je-tì kí Gayusi isi ɔr nɔ-dé rəmə, ɛ ra bin al. ɛ mbatì kuwə ngannjékullə-je lə Kristi rɔ-é-tì rəm, bá ɔgi dow-je kí rangì kadi d'uwə-dé kí rɔ-dé-tì rəm, ɛ ɔsi ta Ja rəm to. Go ta-tì kí Ja pa do kullə ra Diotrepi-tì kí maji al lé, ɛ pa ta do

kullə ra Démétriyusi-ti kí maji tɔ. Ta kí Ja idə Gayusi lé, ɛ idə-é kadi ndaji panjiyə kí majal kin al, ngà kadi ndaji panjiyə kí maji ('Ndó 11).

### *Tɔji rɔ kɪ lapiya kí ra*

<sup>1</sup> †Ma 'ngatógi m'ndàngi mbete kin m'adi-i i Gayusi kí m'ində-i dan kəm-m-ti mɛɛ ta-ti kí tɔgrɔ-ti. <sup>2</sup> Ngonkɔ-m kí m'ində-i dan kəm-m-ti, m'ndigi kadi ɔw kí kete-kete mɛɛ né-je-ti lay ə kadi rɔ-i tò kɪ lapiya titi kí ndil-i tò-né kɪ lapiya kare kin bè tɔ.

### *Kullə ra kí njururu lə Gayusi*

#### *Mat 10:40-42*

<sup>3</sup> Loki ngankɔ-ji-je kí njékadmeɛ d'i nu 'ree, 'pa ta lə ta kí tɔgrɔ-ti kí tò mɛɛ-i-ti rəm, bá njiyə kí i njiyə mɛɛ-é-ti rəm kinlé, rɔ-m nəl-m ɲa. <sup>4</sup> Rɔnəl lə-m kí ɲa lé, to koo kí m'oo 'panè ngan-m-je 'njiyə mɛɛ ta-ti kí tɔgrɔ-ti.

<sup>5</sup> I kí m'ində-i dan kəm-m-ti, i to njéra né kɪ kadmɛɛ adi ngankɔ-ji-je kí njékadmeɛ kí 'to mba-je kàrè, i 'ra sə-dé maji. <sup>6</sup> Ta lə ndigi kí i 'ndigi dow-je lé, dɛ 'pa ta-é rəsi nɔ njékəwna-je-ti. Kɔw mba lə-dé kàrè maji kadi i 'ra sə-dé dɔ-ti asi gangi-é-ti kí à nəl Lubə rəm tɔ. <sup>7</sup> Kdɔ dɛ d'ɔw kdɔ ta kí sobi dɔ 'Babe ə 'taa né ji njékadmeɛ al-je-ti al. <sup>8</sup> Adi dow-je kí bè kinlé bá tò kadi j'uwəi-dé ki rɔ-ji-ti, kdɔ kadi j'toi njéra sə-dé kullə nati sobi dɔ ta kí tɔgrɔ-ti.

† 1:1 1:1 Knj 19:29; Róm 16:23; 1Kɔ 1:14

*Kullə ra kí majal lə Diotrepì kì kullə ra kí njururu lə Démétriyusi*

*1Kɔ 4:18-21*

<sup>9</sup> M'ndàngì mbete sɛ m'adi njékəwnə-je; ngà Diotrepì kí ɓo to kí 'boy ngay dan-dé-ti ra-é kinlé uwə-ji kɪ rɔ-é-ti al. <sup>10</sup> Bɛɓa loki m'a tɛɛ rɔ-si-ti nɔɔ rəmə, m'a pa ta rəsi dɔ kullə ra-é-je-ti. Ɛ lé pa ta-je kí maji al maji al dɔ-ji-ti; kin kàrè usi rɔ-é-ti al adi ngankɔ-ji-je kí njékadmɛɛ kí d'ow kàrè ɛ mbati kuwə-dé kɪ rɔ-é-ti rəm, ɓá ngankɔ-ji-je kí ndigì kuwə-dé kɪ rɔ-dé-ti kàrè ɔgì-dé rəm, ɓá tubə-dé dan njékəwnə-je-ti rəm.

<sup>11</sup> I kí m'ində-i dan kəm-m-ti, 'ndaji né ra kí maji al al, ngà né ra kí maji ɓá 'ndaji. Dow kí njèra né kí maji lé to dow lə Lubə, ngà dow kí njèra né kí maji al lé, gə Lubə al.

<sup>12</sup> Dow-je lay ya 'pa ta kí maji dɔ Démétriyusi-ti, ə ta kí togrɔ-ti\* kí ta-é-ti kàrè toji kí ɛ to dow kí maji tɔ, ɓá jɛ kàrè j'pa ta kí maji dɔ-é-ti ə i kàrè 'gə kí ta lə-ji to ta kí togrɔ-ti.

<sup>13</sup> Né-je nɔ tɔ kadi m'ndàngì ta-é mbete-ti m'adi-i ya, ngà m'ndigì ndàngì mɛɛ mbete-ti al.

<sup>14</sup> M'ində mɛɛ-m-ti kí m'a kow rɔ-i-ti mɛɛ ndɔ-je-ti kí à ree kin ə j'a pa-nə ta kɪ ta-ji jà-jà. <sup>15</sup> Kadi lapiya nɔy sə-i! Nam-i-je 'ra-i lapiya ə i kàrè 'ra lapiya nam-ji-je káre-káre lay adi-ji tɔ.

---

\* **1:12** 1:12 Mɛɛ mbete-ti kí 'ndàngì kí ta grɛkì lé 'panè to ta kí togrɔ-ti ɓá pa ta kí maji dɔ Démétriyusi-ti.

**Ta lə Lubə Kunmindí kí Sigi**  
**Mango: Ta lə Lubə Kunmindí kí Sigi (New**  
**Testament)**

copyright © 2019 Wycliffe Bible Translators, Inc.

Language: (Mango)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

96bdbd07-24d6-556c-9e7c-7269c72880cd